

Il Grischun sco eldorado da viandar

La regenza prenda posiziun sin l'incumbensa da deputà Illario Bondolfi (pcd Cuira) concernent il viandar en il Grischun

■ (mc) Il Grischun è posiziunà bain pertutgant il turissem da viandar. Cun ina rait da radund 11 000 kilometers porschia il Grischun pussaivladads attractivas ed extendidas da viandar. Las vias e sendas da viandar sajan segnaladas e mantegnidas bain. Damai che la gronda part da las pretensiuns fatgas en l'incumbensa Bondolfi sajan ademplidas è la regenza pronta d'acceptar l'incumbensa.

En sia intervenziun parlamentara constatescha deputà *Illario Bondolfi* (pcd Cuira) ch'il turissem sco impurtant factur economic da noss chantun pateschia dapi onns d'ina crisa. Las pernotaziuns sa reduceschian d'incuntin e las perspectives sajan uschè nauschas sco strusch insacura. Ins haja dentant l'impressiun che tant l'uffizi cumpetent sco era Grischun Vacanzas fetschian be pouca lavur per declerar la situaziun nuncuntentaivla. Era departament e regenza hajan ina tenuta d'observaziun, dumandadas sajan dentant bleranz «ideas che gidian a sortir da la spirala negativa», accentuescha Bondolfi. Evident saja dentant che il sector dal turissem da viandar che haja in potenzial enorm saja vegnì negligì en noss chantun. Retschertgas scientificas documenteschian numnadamain ch'il viandar saja per bunamain la mesadad da la populaziun svizra l'activitad preferida durant il temp liber. Adina dapli persunas apprezzeschian da viandar en ina natira intacta e tras bellas cuntradas autenticas. Gest quai possia il Grischun porschier als giasts. Il Grischun saja in veritabel «eldorado da viandar par excellence». Ultra da quai saja il viandar la situaziun da basa e da partenza per ulteriuras activitads turisticas che stattan en stretg connex cun il viandar. Bliers viandants turnian en il Grischun per ir cun skis, per far passlung, per dar tennis, per ir cun velo etc. Quai genereschia ina valur agiuntada per l'entir chantun e quai da stad ed enviern.

Sa posiziunar sco paradis da viandar

Tenor Bondolfi sto il Grischun sa posiziunar cun ina campagna da reclama ed in cler concept sco «paradis da viandar» e quai tant sin plaun naziunal sco internaziunal. Per quest intent stoppian era vegnir messas a



Sendas da viandar en la regiun da la Greina.

KEYSTONE

disposiziun las finanzas necessarias. Persunas dal fatg pretendian ch'i dovria plirs milliuns per onn per quest intent. Per betg puspe crudar en ils musters vegls stoppia vegnir surdada questa incumbensa ad ina nova grupp da lavur. Quella duai avair l'incumbensa d'evaluar in concept correspundent e d'accompagnar e survegliar las mesiras resultantas. Per Bondolfi èsi impurtant che questa grupp vegnia furnada e constituida ordifer ed independentamain dal'uffizi per economia e turissem e da Grischun Vacanzas.

Incumbensa da las vischnancas

En sia resposta accentuescha la regenza che il Grischun saja gia oz posiziunà bain areguard il viandar. Cun var 11 000 kilometers vias e sendas disponia il Grischun d'ina fitg gronda rait da sendas da viandar ch'è segnalada excellentamain e mantegnida bain. Tenor la lescha davart las vias èn las vischnancas responsablas per la construcziun ed il mantegniment da talas vias e sendas. I

saja ina da las incumbensas centralas da l'organisasiun u destinaziun turistica da far reclama per las purschidas da viandar.

Il chantun sustegna las vischnancas areguard la segnalaziun e la garanzia da qualitat cun contribuziuns a favur da l'engroniment da las vias e dals custs da segnalaziun. Tras cunvegns da prestaziun cun SvizraMobila e cun la Cuminanza grischuna per sendas che surpiglian differentas incumbensas sco la controlla statale surordinada da la rait da vias e da rutas da viandar sco era da l'actualisaziun dals differentes inventars.

Dapi l'onn 2007 metta il chantun plinavant a disposiziun ina contribuziun finanziaria considerabla per la campagna da comunicaziun «Gian & Giachen».

La rolla da Grischun Vacanzas

Grischun Vacanzas fetschia reclama per differentas purschidas, uschia era per turas da viandar per divers segments da giasts sco: turas lungas e trekking, turas panoramias, tu-

ras tematicas, turas per famiglias, turas culinaricas, turas da gudiment, turas alpinas, turas en parcs nativals, turas sin chamonas da CAS euv. Sin la pagina d'internet www.graubuenden.ch e www.schweizmobil.ch possian ins consultar las infurmaziuns detagliadas. Uschia fan ins actualmain reclama per 66 rutas da viandar en il Grischun che vegnan colliadas cun ulteriurs servetschs dal turissem. Las mesiras da marketing vegnan era sustegnidas dal chantun en il rom da l'incarica da prestaziun cun Grischun Vacanzas.

Project GrischunBIKE

Ils onns 2010 fin 2015 ha il chantun realisà cun success il project GrischunBIKE che è vegnì finanzià da la Fundaziun grischuna per innovaziun, svilup e perscrutaziun sco er cun meds finanzials da la nova politica regiunala. «Betg sco ultim grazia a quest project GrischunBIKE che è vegnì realisà ils onns 2010 fin 2015 è il Grischun oz sin l'emprima plazza da la Svizra en quai che re-

guarda il segment da velos da muntogna che ha ina valurisaziun intensiva», scriva la regenza.

Project GrischunHIKE

Per augmentar la cumpetitivitad dal chantun Grischun e la valurisaziun ha la regenza plinavant lantschà 2015 in project da plirs onns sut il num GrischunHIKE che cumpiglia differentes elements dal turissem da viandar e che resguarda tut ils partenaris relevants, analoga GrischunBIKE. La finamira da quest project è da megliar las cundiziuns generalas per il turissem da viandar en ils secturs rait da vias ed infrastruttura, transport, alloschament ed ustarias, guidas, purschidas e servetschs, cultura da viandar locala, events sco er organizaziun e colliaziun en ina rait. En quest connex vul ins era resguardar il basegn midà dals giasts. Las singulas mesiras duain ultra da quai vegnir elavuradas e realisadas en stretga collavuraziun cun ils furniturs da prestaziun turisticas.

Il volumen da project importa 3,2 milliuns, da quels vegnan 0,6 milliuns finanziads dal chantun e 0,4 milliuns da la confederaziun. Il project vegn sustegnì en dumondas strategicas d'ina vasta grupp accumpagnanta d'organizaziun specialisadas. Uschia vul la regenza desister d'ina grupp da lavur supplementara.

Basa da svilup è sufficienta

Tenor la regenza è la basa per sviluppar vianavnt systematicamain il turissem da viandar sufficienta. Perquai giuditgescha la regenza in'ulteriura «campagna da reclama che ha cleras intenziuns ed ina basa duvraivla» en la dimensiun da plirs milliuns per onn per posiziunar il Grischun sco paradis da viandar per betg realistica e cunvegnetta en vista a las resursas finanzialas limitadas. La regenza vul era desister da surdar l'incumbensa ad ina grupp da lavur externa. Ella vul bleranz continuar cun il project GrischunHIKE ch'ella ha tschernì e garantir a medem temp la qualitat da la purschida. I saja chausa da las organsaziun turisticas e dals furniturs da prestaziun turisticas d'integrar il tema viandar en lur portofolio e da render enconuscent quel.